

आकाशवाणी जयपुर-अजमेर  
प्रादेशिक समाचार  
दिनांक 29.11.2025 समय: 18.45 बजे

- प्रधानमंत्री नरेन्द्र मोदी पुलिस महानिदेशकों रा सम्मेलन मांय कह्यो-पुलिस बल ने नुवी तकनीक ऊँ लैस करणो ज़रूरीं
- रेल मंत्री अश्विनी वैष्णव कह्यो-राज्य मांय रेलों रा विकास सारू 55 हजार करोड़ रुपया रा खर्च वाळा काम चाल रह्या हैं
- संसद रो सियाळू सत्र एक दिसम्बर ने सरू व्हेला- सरकार काल सगळी पार्टियां री मीटिंग बुलायीं
- प्रधानमंत्री नरेन्द्र मोदी काल आकाशवाणी ऊँ प्रसारित कर्या जावण वाळा खास कार्यक्रम मन की बात मांय विचार बतावेलों

000

प्रधानमंत्री नरेन्द्र मोदी अपराध अर आतंकवाद ने बिल्कुल बर्दाश्त नी करण री नीति कामयाबी सागे लागू करण बाबत पुलिस बल ने नुवी तकनीक वाळी बणावण माथे ज़ोर दीनो हैं वे आज छत्तीसगढ़ मांय राख्यी ज्या पुलिस महानिदेशकों अर महानिरीक्षकों रा 60वां अखिल भारतीय सम्मेलन रा सत्र मांय बोल रह्या हां वे महिलाओं री हिफाज़त रा बारा मांय राख्यी ज्या खास सत्र मांय 'मिशन शक्ति' ने मजबूत बणावण बाबत कह्यो प्रधानमंत्री रो काल ई सम्मेलन रा न्यारा-न्यारा सत्रों मांय भाग लेवण रो कार्यक्रम हैं काल सरू व्ह्या तीन दिन रा ई सम्मेलन रो उद्घाटन गृह मंत्री अमित शाह कीनों ई मौके वे कह्यो के ओ सम्मेलन आंतरिक सुरक्षा रा समाधानों रा पोर्टल रा तौर ऊँ पेश करी ज्यो हैं श्री शाह कह्यो के देश लारला 11 साल मांय कट्टरपंथ, उग्रवाद, विद्रोह अर नशीली चीजों रे खिलाफ अभियान मांय खास कामयाबी हासिल कीनी हैं

000

रेल मंत्री अश्विनी वैष्णव कह्यो हैं के राज्य मांय रेलों रा विकास सारू 55 हजार करोड़ रुपया रा खर्चा वाळा काम चाल रह्या हैं वे कह्यो के राज्य ने रेलवे मांय विकास सारू 10 हजार करोड़ रुपया रो बजट दियो ज्यो हैं वे आज जैसलमेर मांय खबरनवीसों सागे बातचीत करता थकों आ जाणकारी दीनीं रेल मंत्री कह्यो के सरहदी हलकों मांय रेल नेटवर्क ने मजबूत करण सारू अनूपगढ़-जैसलमेर-बाड़मेर ने जोड़बा री खास योजना बनायी जा रही हैं

.....

रेल मंत्री आज जैसलमेर-दिल्ली बीचे नुवी एक्सप्रेस रेलगाड़ी ने जैसलमेर ऊँ हरी झंडी बता र रवाना कीनीं आ गाड़ी 1 दिसम्बर ऊँ रोजीना चालेलों नुवी गाड़ी जैसलमेर ऊँ आशापुरा, रामदेवरा, फलौदी, मारवाड़ जंक्शन, जोधपुर, जयपुर अर अलवर व्हेती दिल्ली रा शकूरबस्ती स्टेशन पूगेलों गाड़ी ने रवाना कर्यों पाछे वैष्णव कह्यो के ई गाड़ी ऊँ दिल्ली तांई रो सफ़र आसाण बणबा सागे सैर-सपाटा ने ही बधावो मिलेलों ई बीचे अमृत स्टेशन योजना रा तहत पाली ज़िला रा मारवाड़ जंक्शन स्टेशन माथे विकास रा करीब 18 करोड़ रुपया रा खर्च वाळा काम कर्या जा रह्या हैं

000

वोटर लिस्टों रा विशेष गहन पुनरीक्षण-एस आई आर कार्यक्रम रा तैत राज्य मांय मतदाताओं री जाणकारी ने डिजिटल करण रो काम करीब-करीब पूरो व्हे ग्यो हैं राज्य रा न्यारा-न्यारा ज़िला मांय एसआईआर सारू जनता मांय उमाव निजर आ रह्यो हैं लोग गणना प्रपत्र भर र संबंधित बीएलओ कने जमा करा रह्या हैं निर्वाचन आयोग रे मुजब 4 नवंबर ने सरू करी ज्यो एस.आई.आर. रा दूजा

दौर रो काम आवता साल 7 फरवरी ने वोटर लिस्टा री छपाई सागे पूरो व्हेलां दूजी कानी कांग्रेस रा नेता सचिन पायलट एसआईआर रा बारा मांय शंका जतायीं

000

निर्वाचन आयोग जनता ऊँ ईसीआईनेट ऐप डाउनलोड करण अर इण ने और बेहतर बणावण सारू राय देवण री अपील कीनी हैं आप 27 दिसम्बर तांई ऐप माथे 'सबमिट ए सजेशन' टैब काम ले र राय दे सको हों आयोग रे मुजब जनता री राय पाछे प्लेटफॉर्म ने और बेहतर बणायो जावेलां ईसीआईनेट प्लेटफॉर्म री आधिकारिक सरुआत जनवरी 2026 ऊँ करण री योजना हैं

000

संसद रो सिंयाळू सत्र एक दिसंबर ने सरू व्हेला, जो 19 दिसम्बर तांई चालेलां इण ने ध्यान राखता थकां सरकार काल सगळी पार्टियां रा नुमाइन्दां री मीटिंग बुलायी हैं इण मांय संसदीय कार्य मंत्री किरन रिजिजू संसद रा दोन्यू सदनां मांय न्यारी-न्यारी पार्टियां रा नेतावां सागे मुलाकात करेलां मीटिंग मांय सरकार, सत्र रे दौरान लोकसभा अर राज्यसभा री कार्रवाई ठीक ढंग ऊं चलावण बाबत् सगळी पार्टियां री मदद मांगेलां

000

प्रदेशभर मांय आज 9 महीना ऊँ 5 साल तांई उम्र रा बच्चां ने विटामिन ए री खुराक पायी ज्यीं आ खुराक स्वास्थ्य केन्द्रां, अस्पतालां, आंगनबाड़ी केन्द्रां अर स्कूलां मांय बच्चां ने 6-6 महीना रा आतरा ऊँ दी जावे हैं जयपुर रा मुख्य चिकित्सा अर स्वास्थ्य अधिकारी डॉ. रवि शेखावत बतायो के साल मांय 2 दफा विटामिन ए री खुराक देवण रो खास कार्यक्रम चलायो जा रह्यो हैं जिण ऊँ रतौंधी सरीखी आंख्यां री बीमारियां अर आन्धा व्हेवण ऊँ बचावण सागे बच्चां मांय बीमारियां ऊँ लड़बा रो बूतो मजबूत बणे हैं

000

प्रधानमंत्री नरेन्द्र मोदी काल आकाशवाणी ऊं प्रसारित कर्या जावण वाळा खास कार्यक्रम "मन की बात" मांय विचार बतावेलां आ हर महीना प्रसारित कर्या जावण वाळा ई कार्यक्रम री 128वीं कड़ी व्हेलां ओ कार्यक्रम आकाशवाणी अर दूरदर्शन रा पूरा नेटवर्क माथे, आकाशवाणी समाचार री वेबसाइट अर न्यूज़ ऑन एआईआर मोबाइल ऐप माथे प्रसारित कर्यो जावेलां ई सागे ई आकाशवाणी समाचार, डीडी न्यूज़, प्रधानमंत्री रा दफ्तर अर सूचना अर प्रसारण मंत्रालय रा यूट्यूब चैनलां माथे ई ओ कार्यक्रम प्रसारित कर्यो जावेलां

0000

मौसम विभाग प्रदेश मांय एक दिसंबर ऊँ घणो सीळो बायरो बाजण रा आसार जताया हैं दो दिसंबर ने सीकर, चूरू, झुंझुनू अर नागौर जिलां मांय शीतलहर सारू चेतायी ज्यो हैं प्रदेश रा केई हलकां मांय काल व्ह्या छांटा-छिडका पाछे ठण्ड रो असर बध ग्यो हैं लारला चौबीस घंटां मांय प्रदेश मांय कम ती कम तापमान 15 डिग्री सेल्सियस रे आरे-सारे रह्यो शेखावाटी हलका रा फतेहपुर मांय सब ऊँ कम 8 दशमलव 9 डिग्री सेल्सियस तापमान दर्ज करी ज्यो ई सागे ई लूणकरणसर मांय 8 दशमलव 8, श्रीगंगानगर मांय 9 दशमलव 6, पिलानी मांय 10, करौली मांय 10 दशमलव 1, नागौर मांय 10 दशमलव 6, दौसा मांय 10 दशमलव 7 अर राजधानी जयपुर मांय 14 दशमलव 7 डिग्री सेल्सियस तापमान नापी ज्यो

000

जालौर मांय महिलावां रे खिलाफ हिंसा खत्म करण अर लिंग आधारित हिंसा री रोकथाम सारू 10 दिसम्बर तांई जागरूकता अभियान चलायो जा रह्यो हैं ई रा तैत कस्तूरबा गांधी आवासीय छात्रावास मांय लिंग आधारित हिंसा री रोकथाम सारू जागरूकता कार्यक्रम राखी ज्यो ई मौके महिला अधिकारिता विभाग रा सहायक निदेशक लक्ष्मणसिंह राजपुरोहित कह्यो के लिंग आधारित हिंसा रोकण री जिम्मेदारी सरकारी तंत्र री व्हेवण सागे ई इण मांय समाज, परिवार अर नौजवानां री भागीदारी ई जरूरी हैं कार्यक्रम मांय टाबरियां ने सखी वन स्टॉप सेंटर अर महिला हेल्पलाइन नम्बर-181 रा बारा मांय जरूरी जाणकारी दीरीजीं

000

लखनऊ मांय व्ही 19वीं राष्ट्रीय जंबूरी मांय राजस्थान स्काउट अर गाइड मांय अव्वल रह्यो हैं जंबूरी मांय राख्यी ज्यी न्यारी-न्यारी होड़ां मांय डीडवाना, कुचामन अर नागौर रा केडेट्स रो खास प्रदर्शन रह्यो राजस्थान री कलर पार्टी देश मांय अव्वल रहता थकां उद्घाटन समारोह अर समापन समारोह मांय झण्डो फहरायो आं जिलां रा स्काउट गाइड रो एडवेंचर बैच दे र मान करी ज्यो

000

राज्य मांय चाल रह्या खेलो इण्डिया यूनिवर्सिटी गेम्स मांय आज निशानेबाजी, वजन ऊंचावण अर साईकिल चलावण री होड़ां व्ही आं खेलां मांय हाल ताई कर्नाटक री जैन यूनिवर्सिटी अव्वल बण्योड़ी हैं राजस्थान ऊं बीकानेर री महाराजा गंगा सिंह यूनिवर्सिटी तीन तमगां सागे 25 वीं ठौड़ माथे हैं

000

दृष्टि बाधित महिलावां री टी-20 विश्व कप होड़ पहली दफा जीतण वाळी भारत री टीम आज राष्ट्रपति द्रौपदी मुर्मू ऊं मुलाकात कीनीं ई मौके टीम री ओर ऊं राष्ट्रपति मुर्मू ने खिलाड़ियां री दस्तखत करी ज्यो क्रिकेट बैट भेंट करी ज्यो राष्ट्रपति दृष्टिहीन महिला टी-20 विश्व कप जीतण परां टीम ने बधाई देता थकां कह्यो के वां री कामयाबी दूजां ने करियर मांय नुवी ऊँचाइयां हासिल करण री सीख देवेलां

000